

MESYUARAT KEDUA, PENGGAL KEEMPAT
PARLIMEN KEEMPAT BELAS
2021

HARI SELASA : 23 NOVEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 9, 12 HINGGA NO. 36)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS (2021)**

PERTANYAAN : LISAN
DARIPADA : TUAN ANYI NGAU (BARAM)
TARIKH JAWAB : 23 NOVEMBER 2021 (SELASA)

SOALAN

TUAN ANYI NGAU minta **MENTERI PERUMAHAN DAN KERAJAAN TEMPATAN** menyatakan rancangan Kementerian berkenaan permohonan penyediaan khidmat Balai Bomba di Pekan Beluru dan Long Lama serta rancangan khidmat bomba di rumah-rumah panjang di kawasan pedalaman.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian ini melalui Jabatan Bomba dan Penyelamat Malaysia (JBPM) telah mengenal pasti dan sedang dalam proses permohonan pemilikan tapak tanah seluas 1.99 ekar di kawasan Pekan Beluru serta 4.0 ekar di kawasan Long Lama bagi tujuan pembinaan balai bomba kategori D. Walau bagaimanapun, pelaksanaan bagi pembinaan kedua-dua balai bomba tersebut adalah bergantung kepada ketersediaan tapak tanah berkenaan dan juga kos yang terlibat.

SOALAN NO : 9

Pada masa ini, kawasan Pekan Beluru mendapat khidmat kebombaian daripada Balai Bomba dan Penyelamat (BBP) Lopeng dengan jarak 70 kilometer yang mengambil masa lebih kurang 1 jam 15 minit untuk sampai ke kawasan tersebut. Bagi kawasan Long Lama pula, kawasan ini adalah di bawah jagaan BBP Marudi yang jaraknya 126 kilometer dengan mengambil masa 3 jam 25 minit untuk sampai.

Justeru itu, Kementerian berpandangan bahawa penubuhan Pasukan Bomba Sukarela (PBS) adalah merupakan langkah yang paling sesuai dalam memastikan penduduk di kedua-dua kawasan tersebut mendapat khidmat kebombaian di peringkat awal.

Kawasan Pekan Beluru mendapat perlindungan kebakaran daripada Pasukan Bomba Sukarela (PBS) Sungai Sebatang Bok Miri yang baru ditubuhkan pada bulan Mac 2021 dengan keanggotaan seramai 7 orang ahli. Kawasan Long Lama pula mendapat perlindungan kebakaran daripada PBS Long Lama yang juga baru ditubuhkan pada bulan September 2021 dengan keanggotaan seramai 7 orang ahli. Bagi meningkatkan keupayaan PBS di kedua-dua kawasan tersebut, Kementerian melalui JBPM akan membekalkan peralatan perlindungan diri (PPE) melalui JBPM negeri Sarawak. Selain itu, keperluan melibatkan peralatan asas pemadaman dan jentera juga akan dibekalkan bergantung kepada peruntukan kewangan semasa.

Kementerian ini sentiasa memandang serius berhubung isu-isu keselamatan melibatkan rumah panjang serta penempatan yang berada jauh daripada balai bomba. Oleh yang demikian, beberapa langkah proaktif telah dan akan diambil dalam memperkasakan pasukan bantuan awal dengan penglibatan komuniti setempat melalui inisiatif seperti berikut:

SOALAN NO : 9

- a) menubuhkan **PBS** di kawasan rumah panjang dan pedalaman bagi membantu dalam proses pemadaman peringkat awal seandainya berlaku sebarang insiden kebakaran;
- b) JBPM memperluas dan memperkasakan penubuhan **Bomba Komuniti**, di mana kefahaman tentang pencegahan kebakaran, latihan kebombaan dan penyediaan peralatan asas kawalan awal kebakaran seperti alat pemadam api, peralatan asas pemadaman seperti pam angkut (bersaiz kecil) dan hos akan disedia dan dibekalkan;
- c) mempertingkatkan **Program Community Emergency Response Team (CERT)** yang juga merupakan salah satu inisiatif Kerajaan Negeri Sarawak bertujuan untuk melatih masyarakat atau komuniti setempat di suatu lokaliti agar mampu bertindak sebagai pasukan tindak balas awal kecemasan (*first responder*); dan
- d) melaksanakan kempen kesedaran keselamatan kebakaran melalui program 1 Rumah 1 Alat Pemadam Api (1RAPI), Sedia Urus Isi Rumah (SURI) dan penyediaan alat pengesan asap serta gas (*MyAlert*).

Kementerian melalui JBPM juga akan terus memantapkan hubungan kerjasama dengan pihak kerajaan negeri, syarikat swasta dan *Non-Governmental Organizations* (NGO) melalui program *Corporate Social Responsibility* (CSR) dalam mengadakan latihan dan pencegahan di kawasan-kawasan rumah panjang atau pedalaman (*Outreach* dan *Summer Camp*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : DR. KELVIN YII LEE WUEN [KUCHING]

TARIKH : 23 NOVEMBER 2021 (SELASA)

SOALAN

DR. KELVIN YII LEE WUEN [BANDAR KUCHING] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan tentang rancangan Kementerian untuk menurunkan harga test sendiri COVID-19 yang penting untuk Pelan Saringan COVID-19 Kebangsaan.

JAWAPAN

Tuan Yang di-Pertua,

Kementerian telah menetapkan harga kit ujian sendiri COVID-19 bermula 5 September 2021 iaitu pada harga RM19.90 (runcit) dan RM16.00 (borong). Penurunan harga kit ujian ini daripada harga permulaan sebanyak RM39.90 amat melegakan masyarakat yang terkesan dari segi perbelanjaan untuk memastikan tahap kesihatan sentiasa baik melalui pemeriksaan kit ujian sendiri ini. Penetapan harga ini telah mengambilkira pemantauan harga yang telah dibuat di pelbagai peringkat untuk menentukan harga kawalan yang munasabah dan kesan daripada faktor persaingan sebelum harga kawalan ditentukan.

Penurunan harga kit ujian sendiri ke paras lebih rendah sedang diperhalusi oleh pihak kementerian melalui sesi libat urus dengan pihak syarikat pembekal kit ujian ini bagi mendapatkan pandangan pemain industri serta agensi kerajaan yang terlibat termasuklah dengan mengambilkira harga jualan kit ujian sendiri setelah saluran penjualan diperluaskan kepada hampir 10,000 premis yang melibatkan pasaraya selain daripada farmasi dan klinik. Kementerian sentiasa prihatin dan akan berusaha sebaik mungkin untuk mendapatkan pertimbangan harga terbaik agar kedua-dua pihak (pengguna dan peniaga) sama-sama mendapat manfaat daripada harga baru sekiranya diperkenalkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN RAMLI BIN MOHD NOR (CAMERON
HIGHLANDS)**

TARIKH : 23 NOVEMBER 2021 (SELASA)

SOALAN

TUAN RAMLI BIN DATO' MOHD NOR [CAMERON HIGHLANDS] minta **MENTERI DALAM NEGERI** menyatakan apakah perancangan yang dilakukan oleh Kementerian bagi membaik pulih atau menggantikan balai-balai polis daerah dan juga pondok-pondok polis yang telah lama di seluruh Malaysia.

JAWAPAN

Tuan Yang Di Pertua,

Kementerian Dalam Negeri (KDN) dan Polis Diraja Malaysia (PDRM) telah merangka perancangan lima (5) tahun bagi membina baharu, mengganti atau membaik pulih Ibu Pejabat Polis Daerah (IPD), balai dan pondok polis di seluruh negara. Berdasarkan perancangan pemantapan pengurusan PDRM di bawah Pelan Tindakan Perancangan Strategik Polis Diraja Malaysia (PDRM) 2021-2025, sasaran lima (5) tahun PDRM adalah untuk merancang pelaksanaan 103 projek pembangunan prasarana merangkumi Ibu Pejabat Kontinjen (IPK), Ibu Pejabat Daerah (IPD), Balai Polis dan kuarters. Daripada jumlah tersebut, PDRM menyasarkan untuk menyiapkan sebanyak 15 projek iaitu lima (5) buah balai, tujuh (7) IPD, tiga (3) IPK dan 1,817 unit kuarters dalam tempoh berkenaan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK MOHD. AZIS BIN JAMMAN
[SEPANGGAR]**

TARIKH : 23 NOVEMBER 2021 (SELASA)

SOALAN

DATUK MOHD. AZIS BIN JAMMAN minta **MENTERI
PEMBANGUNAN LUAR BANDAR** menyatakan adakah benar
Kementerian akan menutup Kolej Poly-Tech Mara (KPTM) cawangan
Semporna dan apakah sebab-sebabnya.

JAWAPAN

Tuan Yang di-Pertua,

Untuk makluman Yang Berhormat, Kolej Poly-Tech MARA (KPTM) Semporna telah mula beroperasi pada tahun 2010 yang menawarkan pengajian dalam peringkat diploma dengan kapasiti pelajar 600 orang.

Prestasi pengambilan pelajar di KPTM Semporna menunjukkan penurunan yang ketara pada setiap tahun. Tambahan pula, isu keselamatan di kawasan Semporna turut menyumbang kepada kekurangan pelajar di kampus tersebut. KPTM Semporna telah merekodkan kerugian terkumpul berjumlah RM28.5juta sejak mula beroperasi pada tahun 2010 sehingga kini, dengan purata kerugian tahunan sebanyak RM2.45 juta. Kerugian ini disebabkan oleh jumlah pengambilan pelajar baharu yang tidak mencapai sasaran serta kos operasi yang tinggi.

Justeru, berdasarkan penjelasan di atas, operasi KPTM Semporna akan ditutup sepenuhnya pada 31 Julai 2022 dan telahpun mendapat kelulusan Kementerian Pengajian Tinggi.

Ketika ini, terdapat 169 pelajar sedia ada yang akan menamatkan pengajian secara berperingkat dengan baki 18 pelajar akan menamatkan pengajian pada Julai 2022. Pelajar-pelajar yang tidak dapat menamatkan pengajian berdasarkan semester sebenar akan ditawarkan untuk menyambung pengajian yang sama di cawangan KPTM di Semenanjung Malaysia. Staf KPTM Semporna berstatus tetap ditawarkan untuk berpindah ke cawangan KPTM di semenanjung, atau memilih Skim Pemisahan Sukarela (VSS). KPTM telah memperuntukan sejumlah RM1.33 juta untuk elaun perpindahan staf dan pampasan VSS.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 23 NOVEMBER 2021 (SELASA)

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI SUMBER MANUSIA** menyatakan apakah tindakan yang diambil terhadap ejen-ejen yang membawa masuk pekerja secara haram di Australia dan Korea Selatan serta berapa ramai yang telah diambil tindakan setakat ini.

JAWAPAN

Tuan Yang Di Pertua,

Rakyat Malaysia yang pergi ke negara luar untuk bekerja secara haram boleh berlaku dalam dua cara, iaitu:

- i. Ditipu selepas dijanjikan akan dijadikan pekerja yang sah yang mana proses dokumentasi kononya akan dibuat apabila mereka telah sampai ke negara destinasi: atau
- ii. Mereka sudah mengetahui dan merancang untuk bekerja secara haram.

Kemasukan bakal pekerja haram ke negara destinasi akan diuruskan oleh individu tertentu dengan menggunakan visa pelancong. Oleh yang demikian amat sukar untuk mengesan dan mengambil tindakan ke atas ejen-

SOALAN NO : 15

ejen haram tersebut kerana mereka beroperasi secara sulit apatah lagi beroperasi dari negara destinasi. Kegiatan ejen-ejen haram amat sukar untuk dikesan malahan mangsa penipuan juga tidak mengenali mereka.

Penghantaran pekerja keluar negara secara sah hanya boleh dilakukan oleh Agensi Pekerjaan Swasta (APS) yang berlesen sahaja. Bagi mengatasi masalah penipuan oleh agen-agen pekerjaan haram, Akta Agensi Pekerjaan Swasta 1981 (Akta 246) telah memperuntukan mana-mana syarikat yang ingin menjalankan aktiviti merekrut pencari kerja tempatan untuk bekerja di luar negara, perlu memperolehi lesen kategori B atau C di bawah Akta tersebut. Agensi Pekerjaan Swasta akan menjalankan proses merekrut dan menghantar bakal pekerja secara teratur ke luar negara sebagaimana prosedur yang ditetapkan oleh Jabatan Tenaga Kerja.

Sehingga 31 Oktober 2021, jumlah Lesen B dan C yang telah dikeluarkan kepada Agensi Pekerjaan Swasta yang aktif seperti berikut :

Lokasi	Lesen B	Lesen C	Jumlah
Semenanjung Malaysia	301	477	778
Sabah	1	45	46
Sarawak	3	22	25
Jumlah	305	544	849

Mana-mana orang yang melanggar peruntukan di bawah Akta ini, apabila disabitkan telah melakukan **suatu kesalahan boleh dikenakan denda tidak melebihi RM200,000 atau dipenjarakan tidak melebihi 3 tahun atau kedua-duanya**. Sehingga kini masih belum ada Agensi Pekerja Swasta di ambil tindakan di bawah Akta Agensi Swasta (Akta 246) kerana menjalankan aktiviti yang menyalahi undang-undang.

Kerajaan sentiasa menyebarkan luas maklumat kepada umum supaya tidak tertipu dengan tawaran kerja yang bergaji lumayan di luar negara bagi meningkatkan tahap kesedaran dikalangan awam.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DR. AZMAN BIN ISMAIL [KUALA
KEDAH]**

TARIKH : 23 NOVEMBER 2021 (SELASA)

SOALAN

DR. AZMAN BIN ISMAIL minta **MENTERI KESIHATAN** menyatakan strategi Kementerian Kesihatan dalam menangani ledakan penyakit-penyakit tidak berjangkit (NCD) di Malaysia.

JAWAPAN

Tuan Yang di-Pertua,

1. Kementerian Kesihatan menyedari bahawa beban penyakit tidak berjangkit atau dikenali sebagai NCD iaitu *Non-Communicable Diseases* seperti diabetes dan hipertensi dalam kalangan masyarakat amat membimbangkan. Tinjauan Kebangsaan Kesihatan dan Morbiditi (NHMS) dijalankan oleh Kementerian Kesihatan setiap empat (4) tahun sekali untuk menganggarkan beban penyakit tidak berjangkit di negara ini. NHMS yang terkini pada tahun 2019 menganggarkan, seramai 1.7 orang dewasa menghidap tiga (3) penyakit NCD atau faktor risiko utama, manakala 3.4 juta orang dewasa menghidap dua (2) penyakit NCD atau faktor risiko utama, termasuk penyakit diabetes, hipertensi dan juga kolesterol tinggi.

2. Kementerian Kesihatan memberi fokus terhadap strategi pencegahan dan kawalan NCD pada peringkat awal mengikut *Life Course Approach* berdasarkan Pelan Strategik Kebangsaan Penyakit Tidak Berjangkit 2016-2025. Polisi, pelan dan perkhidmatan mengikut *Life*

Course Approach untuk pencegahan dan kawalan NCD mengambil kira keperluan kesihatan dan sosial di semua peringkat kehidupan bermula dengan kesihatan dan pemakanan ibu (semasa *pre-conception*, *antenatal* dan *post-natal*), meneruskan amalan pemakanan bayi yang betul termasuk promosi penyusuan susu ibu, promosi amalan gaya hidup sihat yang berterusan ke arah proses penuaan yang sihat serta menjalankan program pemerkasaan khusus untuk penuntut sekolah dan institusi pengajian tinggi melalui program *Health Promotion in Learning Institution* (HePiLI) termasuklah Program Doktor Muda, Program Ekspresi Anak Remaja Lestari (PEARL) dan Program Siswa Siswi Sihat (PROSIS); serta untuk komuniti dan warga kerja melalui program KOSPEN dan KOSPEN Plus. Daripada segi perawatan pula, kerajaan memberi intervensi menyeluruh untuk pesakit yang menghidap NCD yang mendapatkan rawatan di klinik-klinik kesihatan mahu pun hospital.

3. Disamping itu, Agenda Nasional Malaysia Sihat atau ANMS telah diluluskan oleh Jemaah Menteri pada 7 Ogos 2020 merupakan tawaran baharu kerajaan yang bertujuan menjadikan rakyat Malaysia sihat sejahtera melalui pembudayaan hidup sihat dan kelestarian persekitaran yang menyokong hidup sihat. Kementerian Kesihatan juga telah menubuhkan Jawatankuasa Kabinet Agenda Nasional Malaysia Sihat (ANMS) yang dipengerusikan oleh YAB Perdana Menteri dan bertindak sebagai platform peringkat tertinggi bagi membincangkan dan mengenalpasti polisi serta tindakan susulan bagi menangani NCD yang memerlukan penglibatan aktif pelbagai kementerian dan agensi. Terma rujukan utama bagi JK ANMS adalah untuk menentukan polisi dan inisiatif bagi mewujudkan persekitaran hidup yang menyokong perubahan tingkah laku masyarakat kepada amalan pemakanan yang sihat dan gaya hidup yang aktif.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : TUAN AHMAD FADHLI BIN SHAARI (PASIR MAS)

TARIKH : 23 NOVEMBER 2021 (SELASA)

SOALAN

TUAN AHMAD FADHLI BIN SHAARI [PASIR MAS] minta **MENTERI DALAM NEGERI** menyatakan jumlah tahanan SOSMA yang masih berada di dalam tahanan Kerajaan dan pecahan kesalahan yang dilakukan.

JAWAPAN

Tuan Yang Di Pertua,

Terdapat seramai 283 orang masih berada di dalam tahanan di bawah Akta Kesalahan Keselamatan (Langkah-Langkah Khas) 2012 (SOSMA) atas pelbagai kesalahan iaitu antaranya di bawah seksyen 130J Kanun Keseksaan (mencari atau memberi sokongan bagi aktiviti keganasan), seksyen 130JA Kanun Keseksaan (pergi, menerusi atau dari Malaysia bagi perlakuan keganasan), seksyen 130JB Kanun Keseksaan (memiliki bahan keganasan), seksyen 130V Kanun Keseksaan (mengganggotai kumpulan jenayah terancang) dan seksyen 130Y Kanun Keseksaan (bersekongkol atau bersubahat dengan kumpulan jenayah terancang).

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK DR SHAHRUDDIN BIN MD SALLEH
[SRI GADING]**

TARIKH : 23 NOVEMBER 2021 (SELASA)

SOALAN

DATUK DR SHAHRUDDIN BIN MD. SALLEH minta **MENTERI KESIHATAN** menyatakan perkembangan akta baharu melibatkan penggunaan tembakau, vape, rokok elektronik dan shisha yang sepatutnya dibentangkan pada tahun lepas.

JAWAPAN

Tuan Yang di-Pertua,

1. Deraf Akta Baharu Kementerian Kesihatan Malaysia berkenaan kawal selia produk tembakau dan rokok elektronik sebelum ini telah disediakan dan dirangka berdasarkan keputusan Jemaah Menteri pada tahun 2016 iaitu Memorandum Bersama Kementerian Kesihatan, Kementerian Perdagangan Dalam Negeri dan Hal Ehwal Pengguna (KPDNHEP) serta Kementerian Sains, Teknologi dan Inovasi (MOSTI).
2. Deraf Akta tersebut telah dihantar kepada Jabatan Peguam Negara pada Ogos 2019 untuk gubalan namun dipulangkan semula kepada Kementerian Kesihatan Malaysia bagi mendapatkan mandat baru daripada kerajaan susulan berlakunya beberapa kali pertukaran pucuk pimpinan negara sejak tahun 2018.

3. Namun begitu, satu keputusan terbaru daripada Jemaah Menteri berkaitan kawal selia rokok elektronik berdasarkan kertas memorandum yang diangkat oleh Kementerian Kewangan pada 14 Julai 2021 telah diperolehi.

4. Susulan itu, Kementerian Kesihatan Malaysia telah mengambil tindakan untuk menyemak semula dan membuat penambahbaikan ke atas draf Rang Undang-Undang kawal selia produk-produk rokok supaya kawal selia ketat yang dihasratkan oleh Kerajaan dapat dilaksanakan.

5. Deraf yang telah dikemaskini ini juga akan meliputi kawalan terhadap semua produk merokok konvensional iaitu rokok dan hasil tembakau yang lain di mana semua produk-produk ini adalah dikawal di bawah Peraturan-Peraturan Kawalan Hasil Tembakau (PPKHT) 2004, Akta Makanan 1983. Pengwujudan Akta baharu ini akan membolehkan kawalan yang lebih komprehensif dapat dilaksanakan terutama kepada produk-produk baharu atau *New Emerging Smoking Product* yang menarik lebih ramai perokok muda namun juga mengancam kesihatan rakyat Malaysia.

6. Satu Memorandum Jemaah Menteri berkaitan draf Akta baharu KKM ini akan diangkat dalam masa terdekat. Kementerian Kesihatan telah mensasarkan untuk membentangkan bacaan pertama, kedua dan ketiga draf Akta ini selewat-lewatnya pada penggal pertama Sidang Dewan Rakyat 2022. Permohonan tarikh pembentangan ke Dewan Rakyat telah dibuat melalui pihak Bahagian Hal Ehwal Undang-Undang (BHEUU), Jabatan Perdana Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : DATUK SERI ROBERT LAWSON CHUAT
[BETONG]**

TARIKH : 23 NOVEMBER 2021 (SELASA)

SOALAN

DATUK ROBERT LAWSON CHUAT [BETONG] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah perancangan kementerian untuk merancakkan lagi sektor peruncitan dan sektor perdagangan pengedaran selaras dengan usaha Kerajaan untuk memulihkan semula ekonomi.

JAWAPAN

Tuan Yang di-Pertua,

Untuk makluman Ahli Yang Berhormat, Sektor Perdagangan Pengedaran merupakan komponen penting dalam ekonomi Malaysia, ianya menyumbang **17.2% kepada keseluruhan Keluaran Dalam Negara Kasar (KDNK) pada tahun 2019**. Walau bagaimanapun, sumbangan Sektor Perdagangan Pengedaran pada tahun 2020 menyaksikan penguncupan kepada 16.97% **disebabkan oleh kesan krisis pandemik global Covid-19 terhadap ekonomi dunia**. Prestasi sektor ini juga semakin terkesan pada tahun 2021 dengan menyaksikan penurunan prestasi bagi suku kedua tahun 2021 mencatatkan -2.1%.

Tidak diragukan lagi, pandemik Covid-19 merupakan cabaran ekonomi terbesar yang dihadapi negara sejak merdeka, melampaui krisis kewangan Asia pada tahun 1997. Perniagaan terdedah kepada risiko baru iaitu dari gangguan rantai bekalan hingga menyebabkan **lebih banyak program/projek intervensi terpaksa diselaraskan semula untuk sampai kepada pengguna**. Ianya mendorong beberapa perubahan dalam sektor perdagangan pengedaran, terutamanya dari segi perubahan model perniagaan hingga perubahan struktur ekonomi. Dengan penutupan beberapa sektor utama perdagangan pengedaran (peruncitan) dibawah PKP/PPN ianya sangat memberikan kesan kepada ekonomi negara.

Dalam hubungan tersebut, Kementerian telah mengambil beberapa inisiatif dengan bekerjasama rapat bersama Majlis Keselamatan Negara (MKN) bagi **melonggarkan 36 sub sektor perdagangan pengedaran dalam memulih kembali ekonomi domestik negara**. Ianya dilihat sangat signifikan dan positif dengan pembukaan secara berperingkat bermula daripada 16 Ogos 2021 sehingga kini.

Pada masa yang sama, bagi merancakkan semula aktiviti sektor peruncitan yang terkesan akibat PKP/PPN, Kementerian ini telah merangka **Program Jualan Malaysia (PJM) dan Kempen Beli Barangan Malaysia (KBBM)** bagi merancakkan dan memulihkan Sektor Peruncitan.

Selain itu, Kementerian juga melaksanakan Kempen **Pembudayaan Norma Baharu Sektor Peruncitan** bagi memastikan Standard Operating Procedur (SOP) Sektor Peruncitan dapat dipatuhi dan dilaksanakan dengan baik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN WILLIAM LEONG JEE KEEN (SELAYANG)

TARIKH : 23 NOVEMBER 2021 (SELASA)

SOALAN

TUAN WILLIAM LEONG JEE KEEN minta **MENTERI PERUMAHAN DAN KERAJAAN TEMPATAN** menyatakan lokasi tertentu "Rawang Land 3" yang mana insinerator sisa buangan kepada tenaga yang pada asalnya akan dibina di Taman Beringin Kepong dan langkah-langkah untuk memastikan penduduk Rawang selamat dari pencemaran dan bahaya lain.

JAWAPAN

Tuan Yang di-Pertua,

Cadangan lokasi baharu pembinaan loji rawatan sisa pepejal *waste to energy* (WtE) bagi menggantikan Taman Beringin, Kepong, Kuala Lumpur adalah di Rawang Land 3, Rawang, Selangor. Kawasan ini terletak berhampiran dengan Kawasan Perindustrian Kri Rawang. Kawasan perumahan yang paling berhampiran adalah Taman Tun Perak, Taman Tun Teja dan Taman Pinggiran Pelangi dengan jarak masing-masing sejauh 1.4km, 1.5km dan 2km dari tapak cadangan WtE Rawang, Selangor.

Bagi memastikan keselamatan penduduk sekitar daripada pencemaran dan risiko kesihatan, Kajian Impak Alam Sekitar (*Environmental Impact Assessment, EIA*) di tapak Rawang tersebut akan dilaksanakan. Kajian ini adalah bagi mengesan potensi pencemaran dan impak pendedahan kepada penduduk sekeliling sebelum langkah-langkah pencegahan dan mitigasi dapat digariskan. Kementerian akan memastikan segala langkah pencegahan dan mitigasi pencemaran alam sekitar tersebut dipatuhi sepenuhnya oleh pihak kontraktor dan operator loji agar keselamatan dan kesihatan penduduk sekeliling sentiasa dilindungi. Pematuhan kepada syarat EIA akan dipantau secara dalam talian (*online*) dan masa sebenar (*real-time*) melalui *Continuous Emissions Monitoring Systems* (CEMS) yang dihubungkan secara terus kepada Jabatan Alam Sekitar (JAS).

Loji WtE Rawang Land 3 juga akan dilengkapi dengan sistem teknologi rawatan pencemaran udara yang berupaya merawat pelepasan gas supaya mematuhi piawaian yang ditetapkan oleh JAS sebelum dilepaskan ke udara. Kementerian yakin langkah-langkah tersebut dapat memastikan keselamatan penduduk sekitar adalah terjamin.

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN SANISVARA NETHAJI RAYER A/L
RAJAJI (JELUTONG)**

TARIKH : 23 NOVEMBER 2021 (SELASA)

SOALAN

TUAN SANISVARA NETHAJI RAYER A/L RAJAJI [JELUTONG] minta **MENTERI DALAM NEGERI** menyatakan tindakan-tindakan yang telah diambil dalam usaha mengesan lokasi sebenar dan membawa balik Low Taek Jho atau Jho Low.

JAWAPAN

Tuan Yang Di Pertua,

Untuk makluman Ahli Yang Berhormat, selain Malaysia, Singapura juga telah memfailkan pertuduhan terhadap Low Taek Jho pada tahun 2016 dan telah memperolehi *Red Notice* dari INTERPOL pada tahun yang sama. Amerika Syarikat juga telah memfailkan pertuduhan di mahkamah di New York pada 2018 dan waran tangkap telah dikeluarkan ke atas Jho Low pada tahun yang sama. Walau bagaimanapun, INTERPOL yang dianggotai oleh 194 buah negara (*member countries*) tetapi sehingga ke hari ini tiada sebarang maklumat yang diterima oleh Malaysia atau Singapura mahupun Amerika Syarikat daripada mana-mana negara ahli INTERPOL berhubung keberadaan Jho Low. Pada tahun 2019 dan 2020, mantan Ketua Polis Negara, Tan Sri Abdul Hamid bin Bador ada mengeluarkan kenyataan media bahawa Jho Low dipercayai bersembunyi di China. Namun, Kedutaan Besar China telahpun mengeluarkan kenyataan pada tahun 2020 menafikan bahawa Jho Low dilindungi oleh Beijing.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 23 NOVEMBER 2021 (SELASA)

SOALAN

TUAN CHARLES ANTHONY SANTIAGO [KLANG] minta **MENTERI SUMBER MANUSIA** menyatakan cadangan Kerajaan untuk mengubah undang-undang keselamatan dan kesihatan pekerjaan untuk memastikan ada cukup ventilasi di tempat kerja untuk kurangkan penularan COVID-19. Apakah cara-cara Kerajaan membantu majikan untuk menambahbaik sistem pengudaraan selain daripada penyediaan garis panduan.

JAWAPAN

Tuan Yang Di Pertua,

Buat masa ini, sistem pengudaraan dan kualiti udara dalaman dikawal di bawah peruntukan perundangan berikut:

- i. Undang-undang Kecil Bangunan Seragam 1984 (*Uniform Building by Law 1984*) yang dikuatkuasakan oleh Kementerian Perumahan dan Kerajaan Tempatan serta Pihak Berkuasa Tempatan;
- ii. Peraturan 25(2)(a) di bawah Peraturan Kilang dan Jentera (Peraturan Keselamatan, Kesihatan dan Kebajikan 1970), menyatakan kadar pertukaran udara adalah tidak kurang daripada 10 setiap satu jam, bergantung kepada proses yang dijalankan di tempat kerja. Perundangan ini dikuatkuasakan oleh Kementerian Sumber Manusia menerusi Jabatan Keselamatan dan Kesihatan Pekerjaan; dan

- iii. Kod Amalan Industri Kualiti Udara Dalam 2010 (*Industry Code of Practice on Indoor Air Quality 2010, ICOP IAQ*) yang menggariskan peruntukan minimum bagi memastikan kualiti udara dalaman yang baik untuk kesihatan dan keselesaan penduduk bangunan bukan industri (*non-industrial building*).

Kod Amalan Industri Kualiti Udara Dalam 2010 ini dikuatkuasakan oleh Jabatan Keselamatan dan Kesihatan Pekerjaan. Pada ketika ini, Kod Amalan Industri Kualiti Udara Dalam 2010 sedang dipinda dan sebarang keperluan berkaitan dengan pengudaraan dalam memastikan pengurangan risiko penularan COVID-19 akan diambil kira dalam pindaan kod amalan ini.

Sebagai tambahan, bagi mengurangkan risiko penularan COVID-19, Kementerian Sumber Manusia melalui Jabatan Keselamatan dan Kesihatan Pekerjaan telah menerbitkan Panduan Pengudaraan dan Kualiti Udara Dalam Dalam Tempoh Pandemik COVID-19.

Bagi membantu majikan menambahbaik sistem pengudaraan, KSM telah dan sedang mengambil tindakan seperti berikut:

- ii. Sesi taklimat berkenaan Panduan Pengudaraan dan Kualiti Udara Dalam Dalam Tempoh Pandemik COVID-19 kepada hampir 3,000 peserta yang terdiri daripada wakil majikan, pekerja dan pengamal KKP; dan
- iii. Hebahan berkenaan Panduan yang sama melalui platform media sosial dan media elektronik.

Dengan ini, bilangan penaksir kualiti udara dalaman dapat ditingkatkan bagi membantu majikan memastikan kualiti udara dalaman di tempat kerja berada pada tahap yang baik.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN SU KEONG SIONG (KAMPAR)

TARIKH : 23 NOVEMBER 2021 (SELASA)

SOALAN

TUAN SU KEONG SIONG [KAMPAR] minta **MENTERI DALAM NEGERI** menyatakan secara terperinci bilangan pemohon-pemohon yang sedang di pertimbangkan oleh Kementerian dalam permohonan kewarganegaraan di bawah Perkara 15A Perlembagaan Malaysia setakat 30 September 2021. Nyatakan sebab kelewatan permohonan tersebut diluluskan.

JAWAPAN

Tuan Yang Di Pertua,

Berdasarkan rekod Jabatan Pendaftaran Negara (JPN) dari tahun 2017 sehingga 30 September 2021, sebanyak **16,950 permohonan** di bawah Perkara 15A Perlembagaan Persekutuan telah diterima.

Setiap permohonan kewarganegaraan akan diteliti secara terperinci tertakluk kepada fakta dan dokumen sokongan yang dikemukakan serta ia diproses mengikut giliran yang sewajarnya sebelum sebarang keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan dan fakta kes. Kementerian Dalam Negeri (KDN) sedang melaksanakan tindakan segera secara berperingkat terhadap semua permohonan kewarganegaraan yang diterima dan sentiasa berusaha untuk memudahcara permohonan berkenaan selagi ia selaras dengan perundangan yang berkuatkuasa

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KEEMPAT,
PARLIMEN KE-14 TAHUN 2021**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ (BACHOK)**

TARIKH : 23 NOVEMBER 2021 (SELASA)

SOALAN

TUAN NIK MOHAMAD ABDUH BIN NIK ABDUL AZIZ minta **MENTERI PERUMAHAN DAN KERAJAAN TEMPATAN** menyatakan cadangan mewujudkan Zon Kawalan Arak di kawasan penjualan minuman beralkohol serta kawasan yang mempunyai kes jenayah bersabit minuman beralkohol yang tinggi.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Pihak Berkuasa Tempatan (PBT) hanya mengeluarkan lesen premis perniagaan di bawah Undang-undang Kecil Pelesenan Tred, Perniagaan dan Perindustrian. Ini termasuk premis-premis perniagaan seperti kedai serbaneka 24 jam, stesen minyak, pasar mini dan pasar raya.

Sekiranya premis-premis perniagaan seperti kedai serbaneka 24 jam, pasar mini dan pasar raya berkenaan ingin menjual minuman beralkohol, permohonan hendaklah dikemukakan ke Pejabat Tanah dan Daerah di kawasan tersebut. Kelulusan pengeluaran lesen menjual minuman keras adalah diluluskan oleh Lembaga Pelesenan Eksais di

setiap daerah sebagaimana yang diperuntukkan oleh Seksyen 35, Akta Eksais 1976 (Akta 176). Kelulusan hanya akan dikeluarkan selepas permohonan lesen penjualan arak memenuhi syarat yang ditetapkan oleh kerajaan negeri, pejabat daerah, Polis Diraja Malaysia (PDRM) dan Jabatan Kastam Diraja Malaysia.

Dalam hal ini, aspek kawalan untuk jualan minuman beralkohol boleh dilaksanakan di peringkat Lembaga Pelesenan Eksais Daerah melalui pertimbangan kelulusan berdasarkan keperluan semasa di sesuatu kawasan. Sebagai contoh, ada PBT yang mensyaratkan supaya lesen perniagaan minuman beralkohol hanya dibenarkan sekiranya premis perniagaan berada sekurang-kurangnya 200 meter jauh dari kawasan yang mana majoriti penduduknya adalah beragama Islam.

Selain itu, terdapat PBT yang menetapkan syarat-syarat tambahan sebagai elemen kawalan kepada premis-premis yang menjual minuman beralkohol. Antara mekanisme kawalan tersebut adalah seperti menetapkan pengusaha atau pemilik premis untuk menampal poster larangan menjual minuman beralkohol kepada orang Islam di pintu/dinding depan premis dan mengasingkan minuman beralkohol dengan lain-lain minuman dalam ruang yang berbeza. Kawalan ini dilakukan bertujuan membendung penjualan minuman beralkohol kepada pembeli beragama Islam atau kepada pengguna yang berumur bawah 18 tahun.

Pada masa ini KPKT tiada perancangan khusus untuk mewujudkan zon alkohol. Melalui Rancangan Tempatan (RT), kerajaan negeri telah mempunyai perancangan guna tanah masa hadapan yang mana ia melibatkan *zoning* guna tanah iaitu perniagaan, perumahan, industri, kemudahan awam serta kawasan lapang. Oleh itu, Pihak Berkuasa Negeri boleh membuat perancangan penyusunan semula premis penjualan minuman beralkohol dengan menetapkan dasar penjualan minuman keras dan menentukan zon kawasan yang dibenarkan menjual minuman beralkohol.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB PUAN MARIA CHIN ABDULLAH (PETALING
JAYA)**

TARIKH : 23 NOVEMBER 2021 (SELASA)

SOALAN

PUAN MARIA CHIN BINTI ABDULLAH [PETALING JAYA] minta **MENTERI DALAM NEGERI** menyatakan apakah langkah-langkah yang sedang diambil untuk menangani isu kanak-kanak dalam tahanan imigresen, termasuk status implementasi projek Alternatives To Detention (ATD) yang telah dipersetujui oleh Menteri KPWKM dan Menteri KDN.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri melalui Jabatan Imigresen Malaysia (JIM) komited dalam memastikan kebajikan dan keselamatan semua tahanan depot imigresen termasuk kanak-kanak. Sehingga 11 Oktober 2021, terdapat 1,475 orang (7.5%) tahanan kanak-kanak daripada keseluruhan 19,722 orang tahanan di semua depot imigresen dan depot imigresen sementara di seluruh negara.

Antara langkah yang diambil oleh Kerajaan dalam menangani isu ini termasuk cabaran perkembangan kesihatan minda kanak-kanak dalam tahanan imigresen adalah melalui pelaksanaan projek rintis *Alternative to Detention* (ATD) bagi kanak-kanak tanpa penjaga dan terpisah yang diterajui Kementerian Pembangunan Wanita, Keluarga dan Masyarakat. Projek rintis ATD yang dicadangkan untuk pelaksanaan di Malaysia merupakan satu penjagaan alternatif kepada kanak-kanak terpisah dan tanpa penjaga (*unaccompanied and separated*) di depot imigresen di mana kanak-kanak tersebut akan mendapat pelindungan dan perkhidmatan sokongan melalui pemeliharaan berasaskan keluarga untuk memenuhi keperluan asas seorang kanak-kanak.

Kementerian Pembangunan Wanita, Keluarga dan Masyarakat telah menyediakan prosedur operasi standard bagi pelaksanaan projek rintis ini dan Kementerian Dalam Negeri melalui Jabatan Imigresen Malaysia komited dalam memberikan kerjasama bagi memastikan kelancarannya.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN DR. MASZLEE B. MALIK (SIMPANG
RENGGAM)**

TARIKH : 23 NOVEMBER 2021 (SELASA)

SOALAN

DR. MASZLEE BIN MALIK [SIMPANG RENGAM] minta **MENTERI
DALAM NEGERI** menyatakan :-

(a) mengapa sehingga hari ini tiada sabitan mahkamah kepada mana-mana suspek yang ditangkap. Bolehkah pihak Kerajaan memasukkan aktiviti kontraban ini dalam jadual di bawah tindakan Akta Pencegahan Jenayah 1959 (POCA) dan Akta Kesalahan keselamatan (Langkah-langkah Khas) 2012 (SOSMA) sebagai senjata untuk mencegah aktiviti ini; dan

(b) apakah mekanisme yang sepatutnya dibuat oleh Kerajaan untuk memastikan penjualan rokok haram ini dapat disekat. Bolehkah rokok haram yang dirampas dijual semula sebagai dana Kerajaan.

JAWAPAN

Tuan Yang Di Pertua,

Bagi menjawab soalan (a), kesalahan aktiviti kontraband tidak dapat diambil tindakan di bawah Akta Pencegahan Jenayah 1959 (POCA) kerana kesalahan ini tidak tersenarai di bawah Jadual Pertama Bahagian I akta ini.

Sekiranya kesalahan mengenai jenayah kontraband hendak dimasukkan ke dalam Jadual Pertama SOSMA 2012 [Akta 747], Kerajaan perlu melihat kesesuaian samada kesalahan kontraband itu termaktub di dalam mana-mana para dalam *Preamble* SOSMA 2012, antaranya:

- i. Menyebabkan keganasan terancang terhadap mana-mana orang atau harta, atau untuk menyebabkan sebilangan besar warganegara takut akan keganasan itu;
- ii. Memudaratkan ketenteraman awam di dalam Persekutuan atau mana-mana bahagiannya, atau yang memudaratkan keselamatan Persekutuan atau mana-mana bahagiannya.

Bagi menjawab soalan (b), beberapa langkah telah dilaksanakan oleh kerajaan bagi menyekat penjualan rokok haram seperti berikut:

- i. Operasi penguatkuasaan oleh agensi-agensi penguatkuasa dijalankan dengan lebih aktif;
- ii. Pelaksanaan Rasionalisasi AKSEM di bawah pentadbiran PDRM. Penyerapan fungsi AKSEM bersama anggota sedia ada AKSEM diserap di bawah PDRM akan meningkatkan lagi kecekapan dan perjawatan Pasukan Gerakan Am (PGA) untuk terus menjaga keselamatan dan kedaulatan sempadan negara agar terus terpelihara dan mencegah kemasukan rokok haram ke dalam negara;
- iii. Elemen perisikan manusia (HUMINT) sentiasa terus dipertingkat dan diperkemaskan bagi mencegah penyeludupan rokok haram ke dalam negara dengan menjalankan lebih banyak libat urus bersama

masyarakat dan komuniti setempat; dan

- iv. Perkongsian maklumat perisikan dan operasi bersama pasukan negara jiran akan terus dipertingkatkan bagi mengelakkan kes jenayah rentas sempadan termasuklah penyeludupan rokok ke dalam negara.

Berhubung cadangan pelupusan secara penjualan semula rokok haram yang dirampas untuk dijadikan dana kerajaan, KDN berpandangan bahawa kuasa untuk melucut hak dan melupuskan barang rampasan kontraband seperti rokok haram adalah tertakluk kepada keputusan mahkamah dan pihak Jabatan Kastam Diraja Malaysia (JKDM) dengan merujuk punca kuasa perundangan di bawah Akta Kastam 1967.

Selain itu, tatacara pelupusan barangan kontraband ini turut termaktub di dalam Perintah Tetap Penguatkuasaan (PTP) Jabatan Kastam Diraja Malaysia yang merupakan agensi Kementerian Kewangan Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS 2021**

PERTANYAAN : LISAN

DARIPADA : TUAN CHANG LIH KANG (TANJONG MALIM)

TARIKH : 23 NOVEMBER 2021 (SELASA)

SOALAN

TUAN CHANG LIH KANG (TANJONG MALIM) minta **MENTERI PERUMAHAN DAN KERAJAAN TEMPATAN** menyatakan sama ada PeKT masih diteruskan atau tidak. Berapa peruntukan yang telah dibelanja sejak Januari 2021 sehingga kini.

JAWAPAN

Tuan Yang di-Pertua,

Untuk makluman Ahli Yang Berhormat,

Terlebih dahulu saya bagi pihak Kementerian Perumahan dan Kerajaan Tempatan (KPKT) ingin merakamkan ucapan terima kasih di atas soalan yang dikemukakan oleh **YB Tanjong Malim**.

Penubuhan Penggerak Komuniti Tempatan (PeKT) telah diluluskan melalui Mesyuarat Jemaah Menteri pada 24 Jun 2020 untuk dilaksanakan dalam kawasan Pihak Berkuasa Tempatan (PBT) di Selangor, Pulau Pinang, Negeri Sembilan dan Sabah. Program ini masih diteruskan, walau bagaimanapun, penubuhan PeKT di negeri Sabah tidak dapat dilaksanakan buat masa ini.

SOALAN NO : 27

PeKT merupakan satu inisiatif KPKT untuk mewujudkan komuniti yang bersepadu dan berdaya saing serta memahami aspek pengurusan kewangan dalam menganjurkan aktiviti yang memperkasakan komuniti dan kesejahteraan bandar selaras dengan Dasar Komuniti Negara (DKomN) yang telah diluluskan oleh Jemaah Menteri pada 23 November 2018.

Peruntukan keseluruhan bagi PeKT pada tahun 2021 adalah sebanyak RM 8.627 juta. Setakat ini, 274 orang Pengerusi PeKT telah dilantik daripada Selangor, Pulau Pinang dan Negeri Sembilan. Pengerusi PeKT diberi tanggungjawab untuk mengurus dan melaksanakan aktiviti-aktiviti PeKT di zon masing-masing. Sehingga kini, 46 program/aktiviti PeKT telah dilaksanakan dan jumlah peruntukan yang telah dibelanjakan sehingga 31 Oktober 2021 adalah sebanyak **RM2,519,604.74**.

Siling peruntukan bagi program yang diluluskan adalah sebanyak RM5,000 bagi setiap PeKT. Program yang dibenarkan adalah program berteraskan kluster di bawah DKomN. Konsep pelaksanaan program adalah berdasarkan Tatacara Kewangan Kerajaan, iaitu PeKT perlu melaksanakan program dan membuat perbelanjaan terlebih dahulu sebelum membuat tuntutan bayaran program dalam tempoh tujuh (7) hari selepas program dilaksanakan.

Walau bagaimanapun, Kementerian ini akan mengkaji dan menyusun semula keperluan dan peranan PeKT. Langkah ini adalah wajar supaya ianya seiring dengan inisiatif semasa Kerajaan.

Sekian, terima kasih.

**PEMBERITAHUAN PERTANYAAN DEWAN NEGARA
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 23 NOVEMBER 2021 (ISNIN)

SOALAN

TUAN AHMAD FAHMI BIN MOHAMED FADZIL minta **MENTERI KESIHATAN** menyatakan apa yang sebenarnya berlaku dalam kes-kes suntikan vaksin kosong yang tular dan jumlah rakyat Malaysia yang terkesan akibat vaksin kosong ini.

JAWAPAN

Tuan Yang di-Pertua,

1. Jawatankuasa Petugas Khas Imunisasi COVID-19 (CITF) telah mengeluarkan suatu garis panduan iaitu Garis Panduan Pemantauan Vaksin dan Penyediaan 'Standby List' di Pusat Pemberian Vaksin (PPV) di bawah Program Imunisasi COVID-19 Kebangsaan bagi memastikan pelaksanaan vaksinasi COVID-19 kepada penduduk Malaysia dibuat mengikut tatacara keselamatan dan kualiti yang ditetapkan.
2. Kementerian Kesihatan telah menerima 3 aduan yang melibatkan kakitangan barisan hadapan Kementerian Kesihatan yang bertugas di negeri Kedah, Perak dan Kuala Lumpur. Ketiga-tiga insiden ini membabitkan jururawat yang tidak mematuhi *Standard Operating Procedure* (SOP) pemberian suntikan yang telah ditetapkan.
3. Setelah siasatan dilaksanakan oleh Jabatan Kesihatan Negeri (JKN), didapati bahawa:
 - (i) bagi insiden di Wilayah Persekutuan Kuala Lumpur, jururawat yang bertugas gagal memberi suntikan penuh kerana semasa suntikan dilakukan, klien tiba-tiba mengeraskan otot deltoid yang menyebabkan jarum tertanggal dari picagari. Oleh itu, vaksin yang diberikan tidak mencukupi.
 - (ii) bagi insiden di JKN Perak, jururawat yang bertugas di PPV pandu lalu tidak memeriksa picagari sebelum pemberian suntikan. Beliau telah menyedari kesilapan semasa pemberian suntikan dan menyuntik semula vaksinasi kepada klien serta memohon maaf; dan
 - (iii) bagi insiden di JKN Kedah, jururawat telah silap memberikan vaksin Sinovac kepada penerima dos kedua Pfizer kerana tidak melakukan verifikasi sebelum pemberian suntikan.

4. Tindakan yang diambil oleh Jabatan Kesihatan Negeri terhadap jururawat yang terlibat ialah:

- (i) jururawat direhatkan daripada menjadi vaksinator selepas insiden berlaku;
- (ii) diberikan surat amaran secara pentadbiran; dan
- (iii) diletakkan di bawah pemantauan oleh Penyelia Jururawat bagi tempoh minima tiga bulan untuk memastikan jururawat mematuhi SOP yang ditetapkan.

5. Selain itu, tindakan yang diambil oleh JKN kepada klien adalah:

- (i) bagi kes JKN Perak, Pegawai Perubatan PKD Hilir Perak telah menghubungi klien dan memberi penjelasan berkaitan pemberian dua kali suntikan;
- (ii) bagi kes JKN WP Kuala Lumpur, klien telah dihubungi pada hari yang sama dan diberikan suntikan semula; dan
- (iii) bagi kes JKN Kedah, klien telah dipanggil dan diberikan penjelasan tentang kejadian yang berlaku oleh Pegawai Perubatan dan dinasihatkan agar ke Klinik Kesihatan berdekatan sekiranya terdapat komplikasi.

6. Berdasarkan kepada tindakan yang telah diambil, tiada tindakan tatatertib diambil ke atas jururawat yang terlibat setakat ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN RAMKARPAL SINGH A/L KARPAL
SINGH [BUKIT GELUGOR]**

TARIKH : 23 NOVEMBER 2021 (SELASA)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **MENTERI KESIHATAN** sama ada Kerajaan telah pun memutuskan untuk menyegerakan pemberian vaksin kepada tahanan-tahanan dalam penjara dan depot-depot tahanan dan sekiranya ya, bilakah ia akan dilaksanakan.

JAWAPAN

Tuan Yang di-Pertua,

1. Kementerian Kesihatan mengambil maklum dan mengesahkan bahawa pemberian vaksin kepada tahanan seperti di penjara dan depot imigresen telah dijalankan oleh petugas kesihatan dari Pejabat Kesihatan Daerah masing-masing.

Penjara

Terdapat sebanyak 42 buah penjara di Malaysia. Pemberian vaksin COVID-19 telah diberi kepada tahanan secara berperingkat di penjara bermula dari bulan September 2021. Sehingga 16 November 2021, sebanyak 47,748 orang tahanan yang terdiri dari warganegara dan bukan warganegara, telah diberi lengkap diberikan vaksin COVID-19.

Depot Imigresen

Terdapat sebanyak 21 buah depot imigresen di Malaysia iaitu 15 di Semenanjung, 2 di Sarawak dan 4 di Sabah.

2. Hampir keseluruhan tahanan di depo imigresen telah diberi sekurang-kurangnya suntikan dos pertama vaksin kecuali beberapa depo imigresen di Sabah, iaitu di Depot Imigresen Tawau, Depot Imigresen Sandakan dan Depot Imigresen Kota Kinabalu.

3. Pemberian vaksin dos pertama di Depot Imigresen Bekenu, Sarawak telah bermula pada 27 Julai 2021 yang melibatkan 393 orang tahanan, manakala pemberian dos kedua pula pada 17 Ogos 2021 yang melibatkan seramai 377 orang tahanan.

4. Jumlah kumulatif tahanan di depo imigresen yang telah mendapat suntikan dos pertama adalah seramai 112,324 orang dan seramai 3,379 orang telah mendapat dos kedua (data sehingga 11 Oktober 2021).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK WIRA HAJI MOHD. ANUAR
MOHD. TAHIR [TEMERLOH]**

TARIKH : 23 NOVEMBER 2021 (SELASA)

SOALAN

DATUK WIRA HAJI MOHD. ANUAR MOHD. TAHIR minta **MENTERI KESIHATAN** menyatakan status bertambahnya rakyat telah tergolong masalah kesihatan seperti obesiti dan diabetes akibat terlalu lama menjalani Perintah Kawalan Pergerakan (PKP) COVID-19.

JAWAPAN

Tuan Yang di-Pertua,

1. Tinjauan Kebangsaan Kesihatan dan Morbiditi (NHMS) dijalankan oleh Kementerian Kesihatan pada tahun 2019 menganggarkan, terdapat sebanyak 18.3% atau 3.9 juta rakyat Malaysia menghidapi kencing manis atau diabetes dan hanya separuh daripada mereka mengetahui status penyakit tersebut. Kajian yang sama juga menganggarkan sebanyak 50.1% atau 10 juta dewasa mempunyai masalah berat badan berlebihan atau obes.

2. Manakala menerusi kajian yang dijalankan oleh Kementerian Kesihatan pada tahun 2020 pula, dianggarkan sebanyak 54.2% penduduk dewasa mempunyai masalah berat badan berlebihan atau obes, meningkat 4% daripada NHMS 2019. Data yang diperoehi ini boleh digunakan sebagai proksi prevalen obesiti sementara menunggu kajian NHMS seterusnya pada tahun 2023. Prevalen diabetes juga dijangka bertambah akibat kemerosotan faktor risiko NCD.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

DARIPADA : TUAN CHARLES ANTHONY SANTIAGO [KLANG]

TARIKH : 23 NOVEMBER 2021 (SELASA)

SOALAN

TUAN CHARLES ANTHONY SANTIAGO [KLANG] minta **MENTERI SUMBER MANUSIA** menyatakan pelan Kerajaan untuk mewajibkan syarikat-syarikat e-hailing/p-hailing untuk membayar KWSP, PERKESO dan SIP bagi pekerja-pekerja sektor tidak rasmi. Dan apakah pelan Kerajaan untuk mendaftarkan pekerja tidak rasmi di KWSP, PERKESO dan SIP.

JAWAPAN

Tuan Yang Di Pertua,

Buat masa ini pekerja tidak formal tidak diliputi di bawah Akta Sistem Insurans Pekerjaan 2017 [Akta 800]. Walau bagaimanapun, Kementerian Sumber Manusia melalui Pertubuhan Keselamatan Sosial (PERKESO) menyediakan jaringan perlindungan keselamatan sosial kepada pekerja tidak formal di bawah Skim Keselamatan Sosial Pekerjaan Sendiri (SKSPS), Akta Keselamatan Sosial Pekerjaan Sendiri 2017 [Akta 789].

Perusahaan e-hailing dan perusahaan penghantaran barangan dan makanan dikehendaki secara mandatori mendaftar dan mencarum di bawah Akta 789 sebagai salah satu pelan memastikan kategori tersebut mempunyai perlindungan sosial. Ini kerana mereka merupakan golongan yang berisiko mengalami kemalangan semasa menjalankan pekerjaan.

Bagi tujuan meningkatkan keberkesanan dan pematuhan terhadap Akta 789, Kementerian Sumber Manusia melalui PERKESO mengadakan kerjasama strategik dengan Kementerian Pengangkutan Malaysia untuk

meletakkan syarat wajib bagi pemohon baharu dan pemohon pembaharuan Lesen Vokasional (PSV kepada e-hailing dan GDL kepada p-hailing) serta pemohon baharu dan pemohon pembaharuan Lesen Pengendali (OL) untuk berdaftar dengan PERKESO di bawah Skim Keselamatan Sosial Pekerjaan Sendiri.

Mengenai Kumpulan Wang Simpanan Pekerja (KWSP) pula, dalam usaha menarik lebih ramai pekerja sektor tidak formal termasuk pekerja ekonomi gig untuk menyimpan demi persaraan mereka, KWSP telah memperkenalkan program i-Saraan. Ia adalah program caruman sukarela sehingga RM60,000 setahun yang terbuka kepada semua golongan pekerja tidak formal dan mereka yang tiada pendapatan tetap dan berumur kurang daripada 55 tahun. Sebagai insentif, Kerajaan menyumbang 15% daripada caruman ahli, tertakluk kepada amaun maksimum RM250 setahun. Setakat 30 September 2021, seramai 356,000 ahli telah berdaftar di bawah program i-Saraan.

KWSP telah mengambil langkah proaktif mengadakan sesi libat urus dengan syarikat-syarikat penyedia platform. Baru-baru ini, KWSP dan Grab Malaysia telah menandatangani memorandum persefahaman (MOU) bagi menggalakkan komuniti rakan pemandu dan penghantar menabung untuk simpanan persaraan. Mulai 1 September 2021, Grab Malaysia akan memberi insentif tambahan dalam bentuk caruman KWSP kepada rakan pemandu dan penghantar yang mencarum di bawah i-Saraan dan mencapai syarat kelayakan yang telah ditetapkan oleh Grab.

Pada masa yang sama, KWSP juga giat membuat hebahan di media massa dan media sosial dari semasa ke semasa bagi meningkatkan kesedaran dan pengetahuan orang awam mengenai program i-Saraan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : TUAN HASSAN BIN ABDUL KARIM
[PASIR GUDANG]**

TARIKH : 23 NOVEMBER 2021 (SELASA)

SOALAN

TUAN HASSAN BIN ABDUL KARIM [PASIR GUDANG] minta **MENTERI SUMBER MANUSIA** menyatakan bagaimanakah Rancangan Malaysia ke-12 hendak mengatasi lebih 700,000 orang rakyat Malaysia yang hilang pekerjaan sejak pandemik COVID-19.

JAWAPAN

Tuan Yang Di Pertua,

Dalam tempoh RMKe-12, Kerajaan akan terus melaksanakan inisiatif bagi menggalakkan lebih ramai penyertaan penduduk tempatan dalam pasaran buruh. Antara inisiatif yang akan dilaksanakan adalah dengan menyalurkan tambahan levi yang dikutip melalui pelaksanaan mekanisme levi pelbagai peringkat kepada industri.

Langkah ini bertujuan untuk meningkatkan peluang pekerjaan dan melaksanakan program peningkatan kemahiran dan latihan semula kepada penduduk tempatan.

Selain itu, majikan akan diberikan insentif bagi mewujudkan persekitaran kerja yang kondusif bagi menarik minat lebih ramai penduduk tempatan. Kerajaan juga akan mengurangkan kemasukan pekerja asing terutamanya

yang berkemahiran rendah dan dalam jangka panjang, jumlah pekerja asing dihadkan kepada tidak melebihi 15 peratus.

Fokus pertama di bawah Rancangan Malaysia Ke-12 iaitu merencanakan pertumbuhan ekonomi akan memberi tumpuan kepada usaha mengembalikan semula momentum pertumbuhan kesemua sektor ekonomi dan mewujudkan sumber pertumbuhan baharu.

Pertumbuhan beberapa industri yang strategik dan berimpak tinggi iaitu elektrik dan elektronik, perkhidmatan global, aeroangkasa, industri halal, kreatif, pelancongan, biojisim dan aktiviti pertanian pintar akan dilonjakkan.

Bagi memperkasa tenaga kerja Malaysia agar lebih berdaya tahan, berkemahiran tinggi dan tersohor di peringkat antarabangsa, Kerajaan akan melaksanakan Pelan Strategik Penciptaan Pekerjaan Nasional (*National Job Creation Strategic Plan*). Penciptaan pekerjaan di Malaysia akan dipertingkatkan melalui enam (6) teras utama iaitu:

- i. meningkatkan kerjasama antara industri dan akademik;
- ii. memupuk bakat bagi memenuhi keperluan industri;
- iii. memperkasa usahawan tempatan untuk maju dalam ekonomi semasa;
- iv. memanfaatkan ekonomi gig untuk pencarian peluang penjana pendapatan;
- v. memacu pertumbuhan sektor baharu dan moden; dan
- vi. mempercepat penerapan amalan tempat kerja moden.

Pembangunan bakat berkualiti dan berkemahiran tinggi bagi memenuhi kehendak industri turut diberi tumpuan dalam RMKe-12 melalui usaha menambah baik seluruh sistem pendidikan negara, serta menangani isu ketidakpadanan dalam pasaran pekerjaan. Di antara langkah utama yang akan dilaksanakan adalah seperti berikut:

- i. pendidikan sains, teknologi, kejuruteraan dan matematik (STEM) akan diperkukuh bagi menyediakan murid dengan perubahan teknologi termasuk 4IR;

- ii. program Pendidikan dan Latihan Teknikal dan Vokasional (TVET) akan diperkasa dengan menambah baik ekosistem, meningkatkan kualiti program melalui akreditasi, pengiktirafan dan pensijilan badan bertaraf antarabangsa serta memperkenalkan sistem penarafan institusi TVET; dan
- iii. sistem pendidikan tinggi yang lebih fleksibel akan diwujudkan dan kerjasama dengan industri dipertingkatkan bagi menambah baik kualiti graduan dan memenuhi keperluan industri.

Kerajaan menyedari ekonomi gig merupakan sumber penting dalam pertumbuhan ekonomi negara. Ia telah membuka peluang yang lebih besar kepada rakyat untuk menambah pendapatan, termasuk menawarkan perkhidmatan menggunakan platform digital.

Di bawah RMKe-12, Kerajaan secara berterusan akan mewujudkan ekosistem yang menyokong perkembangan ekonomi gig bagi menggalakkan rakyat memanfaatkan sepenuhnya peluang ini menerusi pelaksanaan Pelan Jalinan Digital Negara atau JENDELA yang bakal menyediakan 100 peratus liputan 4G di kawasan berpenduduk, liputan 5G yang lebih luas, dan jalur lebar talian tetap.

Tuan Yang di-Pertua,

Bagi meningkatkan keupayaan, kemahiran dan daya saing mencari pekerjaan golongan M40, program latihan dan latihan kemahiran semula serta aktiviti keusahawanan akan ditingkatkan di bawah RMKe-12.

Golongan pekerja dan yang terjejas perlu mengambil peluang untuk menaik taraf pengetahuan dan kemahiran sedia ada mereka menerusi inisiatif yang disediakan. Inisiatif ini bukan sahaja memberi nilai tambah untuk meningkatkan pendapatan, tetapi ia juga menjadi platform untuk membuka lebih ruang kebolehpasaran dalam pasaran kerja.

Inisiatif *reskilling* adalah program latihan yang ditawarkan bagi membolehkan pekerja mendapat pengetahuan dan kemahiran terkini yang selari dengan perkembangan teknologi semasa. Inisiatif ini amat bersesuaian

untuk disertai oleh para pekerja yang merasakan pengetahuan dan kemahiran sedia ada mereka tidak lagi relevan dan menepati keperluan semasa.

Inisiatif *upskilling* atau peningkatan kemahiran pula memberi peluang kepada pekerja untuk meningkat, menambah, memperluas atau memperkasakan pengetahuan dan kemahiran dimiliki. Inisiatif ini lebih berfokuskan suatu bentuk intervensi yang membawa nilai tambah kepada kemahiran sedia ada pekerja.

Peningkatan kemahiran yang dilalui oleh pekerja dilihat bukan sahaja boleh dijadikan pemangkin untuk mendapatkan pekerjaan baharu, tetapi ia turut berupaya mendorong kepada penciptaan pekerjaan.

Kementerian Sumber Manusia menerusi Jabatan Tenaga Manusia (JTM), Jabatan Pembangunan Kemahiran (JPK), Pembangunan Sumber Manusia Berhad (PSMB), dan Pertubuhan Keselamatan Sosial (PERKESO) aktif dalam menawar dan menyediakan pelbagai program latihan berteraskan TVET dan pelbagai cabang disiplin pekerjaan.

Agensi-agensi ini menawarkan program latihan kemahiran berteraskan aspek teori dan praktikal mencakupi pelbagai bidang yang bersesuaian dengan permintaan industri semasa. Kursus-kursus jangka pendek dan program perantisan ditawarkan kepada para peserta yang berminat untuk mendalami kemahiran bersesuaian dengan minat dan latar belakang mereka.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 23 NOVEMBER 2021 (SELASA)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI SUMBER MANUSIA** menyatakan keberkesanan agensi-agensi Kerajaan seperti InvestKL dalam mengurangkan kadar pengangguran negara, terutama bagi golongan belia dan para graduan tempatan.

JAWAPAN

Tuan Yang Di Pertua,

Berdasarkan Laporan Kaji Selidik Tenaga Buruh oleh Jabatan Perangkaan Malaysia (DOSM), kadar pengangguran belia berumur 15-24 tahun pada suku ketiga 2021 meningkat 0.7 mata peratus kepada 11.7 peratus berbanding 11.0 peratus pada suku kedua 2021. Kerajaan sentiasa berusaha untuk memperluaskan program latihan pekerjaan atau perantisan bagi peningkatan kemahiran (*upskilling*), latihan semula (*reskilling*) dan silang kemahiran (*cross-skilling*) termasuk kepada golongan belia dan graduan di Malaysia

Kementerian Sumber Manusia melalui **PERKESO** telah menyediakan platform peluang pekerjaan dalam portal MyFutureJobs yang perlu dimanfaatkan oleh setiap pencari kerja terutama golongan belia.

Selain itu, PERKESO telah memperkenalkan inisiatif **PenjanaKerjaya** bagi menggalakkan majikan membuat pengambilan pekerja baharu. Di bawah program ini, pekerja baru ditawarkan elaun mobiliti secara *one-off* sebagai persediaan kerja. Inisiatif ini juga menawarkan **Program Perantisan** yang bertujuan menggalakkan majikan memberi peluang kerjaya untuk lepasan sekolah dan graduan berumur 18 hingga 30 tahun. Jumlah perantis yang telah mendapat peluang menjalani perantisan ialah **44,843 graduan**.

PERKESO turut mempergiatkan beberapa program bagi mengawal kenaikan kadar pengangguran rakyat secara keseluruhannya agar kualiti hidup dapat dipertingkatkan seperti:

- i. Program Karnival Kerjaya;
- ii. Program Insentif Pengambilan Pekerja; dan
- iii. Program latihan kemahiran semula dan peningkatan kemahiran melalui Penyedia Latihan yang dilantik.

PERKESO juga bekerjasama dengan Kementerian Pengajian Tinggi dan Kementerian Belia dan Sukan untuk melaksanakan program-**program penempatan pekerjaan** dan PERKESO turut giat menganjurkan aktiviti temu duga termasuk kepada golongan siswazah dan belia.

Selain itu, Sistem Insurans Pekerjaan (SIP) PERKESO juga menyediakan program-**program bagi peningkatan modal insan dan kebolehpasaran** pekerja seperti khidmat kaunseling kerjaya, pemprofilan kemahiran, penulisan *resume*, latihan persediaan temuduga, latihan kemahiran bahasa dan penyampaian serta seminar pekerjaan bagi mereka yang mencari pekerjaan.

Selanjutnya, usaha pemeriksaan ekosistem bakat diteruskan melalui program-program di bawah **TalentCorp** yang berfokus kepada pembangunan kebolehpasaran dan kebolehkerjaan bakat muda negara melalui inisiatif antaranya:

- a. **Platform analitis penilaian psikometrik bersepadu *Nurturing EXpert Talent* (MYNext)**

Platform ini menggabungkan graduan, pekerja, syarikat dan institusi pendidikan untuk merapatkan jurang di antara penawaran bakat dengan pekerjaan masa hadapan (*future jobs*). **Lebih 160,000 profil bakat** telah mendaftar dengan MYNext yang melibatkan 22 institusi pengajian tinggi awam dan swasta.

- b. **Program Latihan Industri Berstruktur**

Inisiatif ini bertindak sebagai penggalak kepada penglibatan syarikat dan industri untuk melatih bakat muda dalam negara. Ia juga menawarkan lebih banyak peluang penempatan latihan industri berkualiti melalui insentif potongan cukai berganda.

Program ini telah memanfaatkan lebih 90,000 graduan dan sebanyak 26% pelatih industri berjaya mendapat pekerjaan pertama hasil dari tugas Latihan Industri.

- c. ***Young Employable Students* (YES!)**

Program ini merupakan langkah intervensi proaktif dengan kerjasama pemain industri dan juru latih akademik untuk meningkatkan kemahiran kerjaya graduan dalam elemen kepimpinan, kemahiran insani (*soft-skills*), keusahawanan dan pendedahan kepada perkembangan semasa pasaran pekerjaan.

Secara keseluruhannya, YES! telah memberi manfaat kepada lebih 10,000 bakat graduan di institusi pengajian tinggi awam dan swasta.

- d. **Kolaborasi Industri-Akademia [*Industry-Academia Collaboration* (IAC)]**

Program ini merupakan jalinan kerjasama industri untuk kebolehpasaran siswazah bagi memastikan bekalan modal insan

berprestasi tinggi dan sedia untuk pasaran di Malaysia. Kolaborasi ini melibatkan **20 institusi pengajian tinggi** dengan lebih **50 industri** dari pelbagai sektor ekonomi.

e. **Program Pengekalan Bakat Tajaan Kerajaan [Scholarship Talent Attraction & Retention (STAR)]**

Program ini merupakan kolaborasi TalentCorp bersama Jabatan Perkhidmatan Awam (JPA) untuk memudahcara graduan tajaan Kerajaan yang tidak berpeluang mendapat penempatan pekerjaan di sektor awam untuk menyempurnakan ikatan perjanjian biasiswa bersama syarikat dan pemain industri terkemuka Malaysia.

Sehingga Ogos 2021, **lebih 7,000 graduan JPA** telah dilluluskan di bawah program ini untuk berkhidmat bersama syarikat berdaftar melibatkan lebih **3,000 majikan**.

Selain itu, Kementerian melalui **Pembangunan Sumber Manusia Berhad (PSMB)** juga telah melancarkan inisiatif **PENJANA HRDCorp**. Lima (5) skim telah diperkenalkan yang terdiri daripada **Place & Train, B40 Development, SME Development, Industrial Revolution 4.0** dan **Gerak Insan Gemilang (GIG)**.

Skim-skim ini diwujudkan untuk membantu rakyat mendapat penempatan pekerjaan, *self-employed* serta menambah dan meningkatkan kemahiran mereka. Setakat 31 Oktober 2021, PSMB telah meluluskan sebanyak **85,527 pelatih** bagi mengikuti skim-skim yang melibatkan penempatan pekerjaan dan pekerjaan sendiri ini.

Selain itu, PSMB juga menubuhkan **HRDCorp Placement Centre (HPC)** yang berperanan sebagai platform untuk memadankan pekerja dengan peluang pekerjaan yang tersedia oleh majikan. Sehingga kini, sebanyak **35,820 peluang pekerjaan tersedia** melalui HPC dan lebih **4,000 pekerja berjaya** ditempatkan melalui inisiatif ini.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 23 NOVEMBER 2021 (SELASA)

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI SUMBER MANUSIA** menyatakan apakah program pengajian atau kursus jangka pendek yang bersesuaian bagi pelajar yang memilih untuk bekerja selepas tamat Sijil Pelajaran Malaysia (SPM).

JAWAPAN

Tuan Yang Di Pertua,

Kementerian Sumber Manusia melalui Jabatan Pembangunan Kemahiran turut menyediakan kursus jangka pendek dikenali sebagai program modular kepada pelajar yang memilih untuk bekerja selepas tamat persekolahan.

Persijilan Program Modular adalah program jangka pendek yang dibangunkan berasaskan kompetensi yang terdapat dalam Standard Kemahiran Pekerjaan Kebangsaan (NOSS). Objektif program ini ialah:

- (i) Membolehkan pelatih mendapat kemahiran untuk memasuki pasaran kerja dalam masa yang singkat;
- (ii) Membantu memantapkan kemahiran pelatih agar mampu menjadi tenaga mahir yang berkualiti;
- (iii) Membolehkan pekerja sedia ada meningkatkan kemahiran yang dimiliki melalui modul yang relevan dengan pasaran kerja semasa; dan
- (iv) Menggalakkan pelaksanaan latihan secara fleksibel sama ada secara sepenuh masa atau separuh masa bagi mendapatkan kelayakan kemahiran.

Sehingga 31 Oktober 2021, terdapat 294 program modular yang telah diluluskan oleh JPK melibatkan pelbagai bidang kemahiran serta tahap persijilan dan seramai 5781 pelatih telah mendaftarkan diri untuk menjalani program modular ini di seluruh Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

DARIPADA : TUAN SIM CHEE KEONG [BUKIT MERTA JAM]

TARIKH : 23 NOVEMBER 2021 (SELASA)

SOALAN

TUAN SIM CHEE KEONG [BUKIT MERTA JAM] minta **MENTERI SUMBER MANUSIA** menyatakan strategi mengatasi isu gaji tidak berubah (*wage stagnation*) terutamanya di kalangan graduan dan belia.

JAWAPAN

Tuan Yang Di Pertua,

Kadar gaji lebih tinggi boleh dirundingkan dengan majikan setimpal dengan kelayakan dan kemahiran yang dimiliki oleh graduan dan belia. Kadar gaji juga boleh ditetapkan melalui kuasa pasaran yang dimuktamadkan melalui kontrak perkhidmatan dan perundingan Perjanjian Kolektif bagi pekerja yang mempunyai kesatuan sekerja.

Kementerian Sumber Manusia telah menerbitkan Buku Panduan Gaji Permulaan 200 Pekerjaan Terpilih Berasaskan Kemahiran (Buku Panduan Gaji). Tujuan utama Buku Panduan Gaji adalah untuk mengiktiraf graduan dan belia lepasan institusi latihan kemahiran atau universiti dan seterusnya meningkatkan penyertaan tenaga mahir dalam pasaran tenaga kerja negara.

Kewujudannya tidak bersifat mandatori dan hanyalah sebagai panduan bagi majikan dalam menetapkan gaji permulaan bagi sesuatu pekerjaan berasaskan kemahiran.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN M. KULASEGARAN (IPOH BARAT)

TARIKH : 23 NOVEMBER 2021 (SELASA)

SOALAN

TUAN M. KULASEGARAN [IPOH BARAT] minta **MENTERI DALAM NEGERI** menyatakan :-

(a) jumlah pendatang tanpa izin (PATI) yang telah ditahan oleh Kerajaan pada tahun 2020 serta tahun 2021; dan

(b) nyatakan juga jumlah tahanan yang masih ditempatkan di depot imigresen serta pusat tahanan.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri melalui Jabatan Imigresen Malaysia komited dalam memastikan keselamatan negara diutamakan dengan melaksanakan operasi penguatkuasaan secara berterusan serta tindakan pencegahan bagi mengelakkan berlakunya peningkatan jumlah pendatang asing tanpa izin (PATI) di negara ini.

Sepanjang tahun 2020, sebanyak 6,877 operasi penguatkuasaan telah dilaksanakan oleh Jabatan Imigresen Malaysia dengan tangkapan sebanyak 22,671 orang PATI dan 389 orang majikan. Manakala, sehingga 11 Oktober 2021, Jabatan Imigresen Malaysia telah melaksanakan 3,389 operasi melibatkan tangkapan seramai 12,944 orang PATI dan 134 majikan.

Sehingga 11 Oktober 2021, jumlah tahanan di semua depot imigresen dan depot imigresen sementara adalah seramai 19,742 orang PATI.